

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA ZAVIDOVIĆI
OPĆINSKO VIJEĆE



Broj: 01-23-3683/14
Dana: 30.12.2014. godine

Na osnovu člana 6., člana 8. stav 4., člana 9. stav 1. i člana 14. stava 1., Zakona o komunalnim djelatnostima (Službene novine ZE-DO kantona broj 17/08) i člana 25. stav 1. tačka 10. Statuta Općine Zavidovići (Službeni glasnik Općine Zavidovići broj 5/2008 i 5a/2008), na 25. sjednici Općinskog vijeća Zavidovići, održanoj dana 30.12.2014. godine, donesena je

ODLUKA o vodovodu i kanalizaciji

DIO I. OPĆE ODREDBE

Član 1.

- (1) Ovom odlukom propisuju se načini i uslovi obavljanja komunalnih djelatnosti individualne komunalne potrošnje iz oblasti snabdijevanja pitkom vodom i odvođenje i prečišćavanje otpadnih voda.
- (2) Također se propisuju uslovi i načini stalnog snabdijevanja korisnika na području općine Zavidovići (u daljem tekstu: Općina) vodom za piće određene kvalitete, osiguranja potrebnih količina vode za piće, odvođenja i prečišćavanja otpadnih voda i odvođenja atmosferskih voda, kao i utvrđuju higijensko-tehničke i druge mjere za izgradnju, korištenje i održavanje vodovodnih i kanalizacijskih objekata i postrojenja.
- (3) Ova odluka će se primjenjivati i za vodovode i kanalizacije po mjesnim zajednicama kada se predaju na upravljanje Javnom komunalnom poduzeću „Radnik“ d.o.o. Zavidovići (u daljem tekstu Komunalno preduzeće).

Član 2.

Snabdijevanje korisnika vodom za piće, odvođenje i prečišćavanje otpadnih voda i odvođenje atmosferskih voda je djelatnost od posebnog društvenog interesa koju mogu vršiti samo subjekti određeni ovom odlukom u skladu sa zakonom.

Član 3.

Općina Zavidovići i Komunalno preduzeće su obavezni:

- a) osigurati trajno obavljanje komunalnih djelatnosti koje odgovaraju kvalitetom i standardom utvrđenoj visini cijene koju korisnici usluga plaćaju za njihovo izvršenje;
- b) osigurati održavanje komunalnih objekata i uređaja koji su u nadležnosti Komunalnog preduzeća, u stanju funkcionalne sposobnosti;
- c) poduzimati mjere za očuvanje i zaštitu okoliša;
- d) osigurati javnost i transparentnost rada.

Član 4.

Građenje, upravljanje i korištenje objekata i postrojenja za javno snabdijevanje vodom za piće (u daljem tekstu: javni vodovod), odnosno objekata i postrojenja za odvođenje i prečišćavanje

- 584 -

otpadnih voda i odvođenje atmosferskih voda (u daljnjem tekstu: javna kanalizacija) vrši Komunalno preduzeće, kao preduzeće koje upravlja javnim vodovodom odnosno javnom kanalizacijom.

Član 5.

- (1) Gradnju objekata i postrojenja javnog vodovoda odnosno javne kanalizacije mogu vršiti i drugi investitori ili mogu povjeriti izvođenje tih radova drugoj organizaciji registrovanoj za te djelatnosti, ali samo prema tehničkim uslovima Komunalnog preduzeća.
- (2) Izvedene objekte i postrojenja, investitor iz prethodnog stava predaje uz dokumentaciju na upravljanje Komunalnom preduzeću.
- (3) Komunalno preduzeće dužno je primiti na upravljanje izgrađene objekte i postrojenja javnog vodovoda, odnosno javne kanalizacije izgrađene po datim tehničkim uslovima.

Član 6.

Komunalno preduzeće donosi plan razvoja vodovoda i kanalizacije u sporazumu s nadležnim općinskim organima i u skladu s odredbama važećih zakona.

Član 7.

- (1) Pod vodovodnim uređajima smatraju se objekti za zahvatanje i prečišćavanje voda, crpna postrojenja, rezervoari, rasteretne komore, vodovodna mreža s priključcima zaključno s oknom u kome je mjerna garnitura, a koji služe za snadbijevanje korisnika vodom iz vodovoda.
- (2) Vodovodi mogu biti javni i posebni.
- (3) Pod kanalizacijom se smatraju sistemi za prikupljanje otpadnih voda koji čine jedinstvene i funkcionalne cjeline.
- (4) Pod unutrašnjim (kućnim) vodovodnim instalacijama smatraju se svi uređaji, naprave i instalacije iza glavnog priključka (vodomjera) ili okna u kojem je mjerna garnitura.
- (5) Pod unutrašnjim (kućnim) kanalizacijama smatraju se svi kanalizacijski sistemi za prikupljanje i prečišćavanje otpadnih voda do sabirnog okna (septičke jame) iz koga se vrši priključak na kanalizacijsku mrežu, uključujući i sabirno okno.
- (6) Pod korisnicima podrazumjevaju se pravna i fizička lica koja koriste vodu iz vodovoda, i kanalizacijski sistem za odvođenje otpadnih voda (u daljnjem tekstu: korisnici).
- (7) Otpadnim vodama smatraju se:
 - a) fekalne vode,
 - b) sanitarne otpadne vode domaćinstava, ugostiteljskih objekata, bolnica i dr.
 - c) drenažne vode,
 - d) industrijske otpadne vode upotrebene u tehnološkom procesu ili pranju površina namjenjenih za odvijanje tehnološkog procesa,
 - e) atmosferske oborine,
 - f) površinske vode,
 - g) podzemne vode,
 - h) višak vode mješovitog sastava izdvojen preko kišnih preljeva,
 - i) vode koje nisu nastale kao posljedica tehnološkog procesa.

DIO II. VODOVOD

Član 8.

Radi osiguranja potrebnih količina vode za piće određene kvalitete, područje općine Zavidovići se snabdijeva vodom za piće putem javnih vodovoda.

- 585 -

Član 9.

- (1) Voda za piće mora u fizičkom, hemijsko-bakteriološkom i biološkom pogledu zadovoljavati važeće propise o kvalitetu vode za piće, u skladu sa Pravilnikom o zdravstvenoj ispravnosti vode za piće.
- (2) Komunalno preduzeće odgovorno je za pravilnu primjenu propisa i poduzimanje tehničkih mjera kojim se osigurava higijenska ispravnost vode.
- (3) Ispitivanje vode za potrebe snabdijevanja vodom za piće mogu vršiti samo ovlašteni laboratoriji.
- (4) Nadzor nad ispravnošću vode vrše organi uprave nadležni za poslove sanitarne inspekcije.

Član 10.

Vodovodi odnosno pojedini objekti vodovodnog sistema moraju se izgrađivati, koristiti i održavati u skladu sa Zakonom, drugim propisima i ovom Odlukom.

Član 11.

Mjere za zaštitu vode za piće provode se:

- a) ugradnjom, korištenjem i održavanjem svakog pojedinog objekta, koji služi za osiguranje vode u skladu s hidrotehničkim, sanitarnim i seizmičkim propisima,
- b) ograđivanjem objekata i zemljišta,
- c) utvrđivanjem zaštitnih zona, njihovim obilježavanjem i propisivanjem zaštitnih mjera koje se na njima provode,
- d) stalnim nadzorom nad vodom za piće.

Izvorišta

Član 12.

- (1) Prirodna vrela, bunari i drugi vodozahvati koji su u sistemu vodovoda (u daljem tekstu: izvorišta) kao i javni i ulični izljevi moraju se zaštititi prema potrebi s obzirom na geološki sastav terena, sanitarne i druge uslove te s obzirom na njihov značaj za snabdijevanje vodom za piće.
- (2) Izvorišta kao i javni i ulični izljevi moraju biti zaštićeni od namjernog ili slučajnog zagađivanja i od drugih uticaja koji mogu nepogodno djelovati na njihovu izdašnost i ispravnost vode.

Član 13.

- (1) Mjere zaštite i način korištenja izvorišta kao i granice zone sanitarne zaštite određuju se u skladu sa zakonom.
- (2) Izvorišno područje određuje se radi osiguranja potrebnih količina i kvaliteta vode za piće za sadašnje i buduće potrebe općine Zavidovići, a u skladu s rezultatima istražnih radova i stručnih analiza.
- (3) Izvorišno područje se prema stepenu opasnosti od zagađenja dijeli na zone.
- (4) Na izvorištu na kojem nisu propisane mjere zaštite posebno je zabranjeno:
 - a) ispaša i napajanje stoke,
 - b) parkiranje, pranje i popravke vozila,
 - c) pranje rublja,
 - d) svaka radnja usljed koje može doći do zagađenja vode ili oštećenja objekata i postrojenja.

Član 14.

- (1) Komunalno preduzeće dužno je provoditi sve zaštitne mjere propisane za izvorišno područje.
- (2) U slučaju nekontrolisanog ili iznenadnog zagađenja u izvorišnom području, Komunalno preduzeće dužno je odmah poduzeti mjere potrebne da se spriječi štetni uticaj na kvalitet vode za piće.

Javni vodovod

Član 15.

Objektima, postrojenjima, opremom i vodovodnom mrežom javnog vodovoda smatraju se:

- a) izvorišta i izvorišna područja,
- b) pumpne stanice s uređajima za kondicioniranje uključujući elektro-mašinsku opremu,
- c) vodovodna mreža s rezervoarima, prepumpnim stanicama, rasteretnim komorama, svim razvodnim vodovodima, hidrantima i javnim izljevima,
- d) priključci koji se sastoje od spojnog voda od javne ulične cijevi do granice javne površine,
- e) zgrade u kojim su uređaji za upravljanje glavnim i predpumpnim stanicama uključujući i elektroinstalacije s opremom za katodnu zaštitu i daljinsko upravljanje.

Član 16.

- (1) Sredstva za izgradnju javnih vodovoda osiguravaju se u skladu s važećim zakonskim propisima.
- (2) Javni vodovod gradi se u skladu sa prostornim i drugim planovima i programima Općine Zavidovići.
- (3) Vodovodna mreža se polaže na javnim površinama.

Član 17.

Komunalno preduzeće dužno je u redovnim prilikama osigurati stalno snabdijevanje vodom svih svojih korisnika.

Član 18.

- (1) Svi korisnici vode iz javnog vodovoda dužni su štedjeti vodu.
- (2) Nije dozvoljeno rasipanje i prekomjerno trošenje vode, a pogotovo u vrijeme nestašice ili u drugim izvanrednim prilikama.
- (3) Komunalno preduzeće dužno je podnosiocu zahtjeva za priključak na javni vodovod, uz utvrđenu naknadu, dati:
 - a) uslove i tehničke podatke,
 - b) saglasnost za priključenje objekata na javni vodovod, ukoliko je projektna dokumentacija urađena na osnovu datih uslova i tehničkih podataka i ako postoje tehničke mogućnosti za priključenje.

Priključenje korisnika na vodovodnu mrežu

Član 19.

- (1) Vlasnik građevine dužan je priključiti svoju građevinu na komunalnu infrastrukturu pod uslovima utvrđenim propisima koji regulišu oblast prostornog uređenja i građenja, kao i drugim propisima, odnosno prema odlukama općine koje bliže definišu tu komunalnu djelatnost (pod uslovom da postoji kapacitet određenog komunalnog proizvoda i usluge za priključenje novih korisnika koji neće ugroziti postojeće korisnike).
- (2) Vlasnik ili korisnik građevine obavezan je Komunalnom preduzeću, podnijeti pismeni zahtjev za priključenje na gradsku vodovodnu i kanizacionu mrežu sa priložima o dokazu vlasništva ili prava korištenja kao što su izvodi iz zemljišnih knjiga, rješenja o odobrenju gradnje, kupoprodajni ugovori ili ugovori o zakupu i slično.

Član 20.

- (1) Vlasnik građevine plaća troškove priključenja na komunalnu infrastrukturu Komunalnom preduzeću koje izvodi priključenje građevine.
- (2) U troškove iz stava 1. ovog člana nije uključena cijena mjernog instrumenta potrošnje, kao i

vrijednost centralnog, odnosno glavnog mjernog instrumenta za objekte kolektivnog stanovanja, koji se unosi u stalna sredstva Komunalno preduzeća.

Član 21.

Ako su ispunjeni uslovi dati u saglasnosti za priključenje objekata propisani članom 18. ove odluke i ako objekat ima odobrenje za građenje, Komunalno preduzeće dužno je izvršiti priključak na javni vodovod.

Član 22.

- (1) Na javni vodovod u pravilu se priključuje svaka unutrašnja vodovodna instalacija direktnim priključkom.
- (2) U izuzetnim slučajevima, spoj se može izvesti posredno i to samo onda kada vođenje priključka do javnog vodovoda zahtijeva složene investicijske zahvate i kada se ne ugrožavaju normalni uslovi korištenja vode za unutrašnju instalaciju čiji se priključak treba koristiti kao posredan spoj.
- (3) Priključak se vodi preko javne površine iz zemljišta koje pripada objektu čija se unutrašnja vodovodna instalacija priključuje na javni vodovod.
- (4) U slučajevima kada javni vodovod nije uz objekat čija se unutrašnja vodovodna instalacija treba priključiti, odnosno kada se između njih nalazi zemljište drugog vlasnika, vlasnik je dužan pribaviti saglasnost od vlasnika susjednog zemljišta.
- (5) Vodomjer mora biti smješten u posebnoj šahti izgrađenoj po uputstvima Komunalnog preduzeća.
- (6) Vodomjerna šahta mora biti snadbjevena propisanim poklopcem izgrađenim od livenog željeza ili čeličnog lima, čije dimenzije moraju omogućiti ulazak radnika u šahtu, a ako je šahta dublja od 1 metra u njima moraju biti ugrađene i penjalice.
- (7) U slučaju da zbog neodržavanja šahte u ispravnom stanju prijeti opasnost od zagađenja vode, Komunalno preduzeće može obustaviti snadbijevanje vodom potrošača dok se šahta ne osposobi.

Član 23.

- (1) Pojedinačni i zajednički mjerni instrument potrošnje vode za stambenu i poslovnu jedinicu u okviru stambenog objekta kolektivnog stanovanja spadaju u opremu stambene jedinice, a njegovu prvu nabavku, ugradnju, troškove eksploatacije i funkcionisanje snosi vlasnik stambene jedinice kroz taksu za vodomjer i unosi se u stalna sredstva Komunalnog preduzeća Zavidovići.
- (2) Vlasnik stambene jedinice iz stava 1. ovog člana, prilikom nabavke, ugradnje, eksploatacije i funkcionisanja mjernog instrumenta potrošnje dužan je da se pridržava projekta, tehničkih normativa i standarda i uputstava davaoca komunalne usluge.
- (3) Vlasnik stambene jedinice, u okviru kolektivnog ili individualnog stambenog objekta, kao i poslovnog objekta, povjerava održavanje mjernog instrumenta potrošnje Komunalnom preduzeću.
- (4) Prilikom izgradnje novih objekata kolektivnog stanovanja dužnost investitora je da za svaku stambenu ili poslovnu jedinicu obezbijedi odvojen priključak na vodovodnu mrežu. U protivnom, Komunalno preduzeće nije dužno izvršiti priključak novog objekta kolektivnog stanovanja.
- (5) Prilikom izgradnje priključak i mjerilo ulazi u cijenu stambene ili poslovne jedinice.

Član 24.

- (1) Vlasnici stambenih jedinica dužni su održavati i dovesti u funkcionalno stanje, lično ili putem ovlaštenih upravitelja svoje kućne instalacije kao i instalacije koje spadaju u zajedničke dijelove ili uređaje zgrade.
- (2) Komunalno preduzeće ne snosi odgovornost za prekid u pružanju komunalnih usluga ili za štete do kojih dolazi zbog neispravnosti kućnih instalacija ili uređaja, čije održavanje i dovođenje u funkcionalno stanje je u nadležnosti vlasnika stambenih jedinica ili njihovih ovlaštenih upravitelja.
- (3) Vlasnici stambenih jedinica mogu osim ovlaštenim upraviteljima održavanje kućnih instalacija

- povjeriti Komunalnom preduzeću uz odgovarajuću naknadu, pod uslovima predviđenim Zakonom.
- (4) Zabranjene su neovlaštenim licima bilo kakve intervencije na komunalnoj infrastrukturi i postrojenjima.

Član 25.

- (1) Priključenje unutrašnje vodovodne instalacije od vodovodne cijevi javnog vodovoda do granice javne površine ili posredan spoj na unutrašnju vodovodnu instalaciju susjednog objekta vrši isključivo Komunalno preduzeće.
- (2) Ostali dio instalacije mogu izvoditi i druge ovlaštene organizacije, a po uputi i pod nadzorom Komunalnog preduzeća.
- (3) Vlasnik odnosno korisnik unutrašnje vodovodne instalacije ne smije dozvoliti spajanje unutrašnje vodovodne instalacije susjednog objekta na unutrašnju vodovodnu instalaciju svog objekta, odnosno objekta koji koristi putem posrednog spoja, bez odobrenja Komunalno preduzeće.
- (4) Troškovi svih radova računajući i dovođenje zemljišta i objekata na površini drugog vlasnika odnosno kornika u prvobitno stanje kao i eventualna naknada prouzrokovane štete padaju na teret vlasnika ili korisnika objekata čije se unutrašnje vodovodne instalacije priključuju na javni vodovod.
- (5) Korisnici su dužni u svemu se pridržavati odredaba ove Odluke i svoje kućne vodovodne i kanalizacione uređaje i instalacije održavati u ispravnom stanju, kako bi se spriječilo rasipanje vode i nastajanje drugih šteta, u suprotnom slučaju sve nastale štete padaju na njihov teret.

Član 26.

- (1) Sve opravke i izmjene na vodovodnim instalacijama od izvorišta do vanjskog vodovodnog šahta ispred objekta, uzimajući u obzir i instalacije u šahtu do vodomjera, uključujući i vodomjer, vrši o svom trošku Komunalno preduzeće.
- (2) Nužne i hitne popravke i izmjene na vodovodnim instalacijama od šahta do izljevniha mjesta u stambenim objektima vrše o svom trošku vlasnici odnosno korisnici zajedničkih dijelova i uređaja zgrade.
- (3) Komunalno preduzeće dužno je korisnika priključka obavijestiti o namjeravanim radovima, osim u hitnim slučajevima kada se intervencija ne može odlagati.
- (4) Opravka vodovodnih instalacija izvan javne površine i to dio priključka do vodomjera, vodomjer i sklonište za vodomjer i instalacije vrši se o trošku Komunalnog preduzeća s tim što je vlasnik novog objekta obavezan o svom trošku kupiti vodomjer i platiti priključak..
- (5) Za sve namjeravane intervencije na spojnom vodu od granice javne površine do vodomjera, vlasnik odnosno korisnik spoja dužan je obavijestiti Komunalno preduzeće.
- (6) Prijavljeni kvar na javnoj vodovodnoj mreži ili priključnom spoju Komunalno preduzeće dužno je početi otkalanjati u roku od 12 sati nakon obavještenja i bez prekida radova kvar otkloniti.
- (7) Otvaranje i zatvaranje zatvarača i armatura na javnim površinama vrši isključivo Komunalno preduzeće. Neovlaštenim licima nije dozvoljeno manipulisanje zatvaračima i vodovodnim armaturama javnog vodovoda.
- (8) Korisnik može zatvoriti ventil iza vodomjera u slučaju kvara ili popravke na kućnoj vodovodnoj instalaciji.
- (9) Zatvaranje ventila iza vodomjera potrošač može izvršiti samo u slučaju kvara vodomjera, a o tome je najkasnije u roku od dvadesetčetiri sata dužan obavjestiti Komunalno preduzeće.

Član 27.

Korisnik se mora brinuti da se kućne vodovodne instalacije zaštite od oštećenja i kvarova i da uvijek budu ispravne za trajno služenje njihovoj namjeni, kao i da preduzme sve mjere da se dio

vodovodnog priključka i kućne vodovodne instalacije na njegovoj nekretnini (kuća, stan, poslovni prostor) zaštite od smrzavanja i drugih tehničkih oštećenja.

Član 28.

Vlasnik odnosno korisnik javnog vodovoda dužan je priključiti svoje odvodne instalacije na javnu kanalizaciju.

Uskraćivanje komunalnih usluga**Član 29.**

(1) Komunalna usluga ne može se uskratiti korisniku osim ako:

- a) izvrši priključenje na komunalnu mrežu bez prethodno pribavljenog odobrenja nadležnog organa ili Komunalnog preduzeća;
- b) otpočne sa korištenjem komunalne usluge bez prethodne prijave i davanja potrebnih podataka za evidentiranje obveznika plaćanja kod Komunalnog preduzeća;
- c) koristi uslugu protivno propisima ili ugovoru;
- d) ne plati iskorištenu komunalnu uslugu tri mjeseca uzastopno ili odbija da primi račun ili vrati račun za izvršenu komunalnu uslugu bez opravdanog razloga;
- e) neosonovano ometa druge korisnike usluga;
- f) nenamjenski koristi komunalnu uslugu u vrijeme otežanog snabdijevanja, odnosno snabdijevanja uz ograničenje potrošnje (redukciju) o čemu je korisnik blagovremeno obaviješten na odgovarajući način;
- g) bez odobrenja Komunalnog preduzeća izvrši prepravku ili dogradnju na instalacijama komunalne infrastrukture;
- h) je prostor za smještaj mjernog instrumenta potrošnje krivicom ili iz nehata potrošača zagrađen, zaključan ili nepristupačan;
- i) potrošač ima potrošnju vode preko 250 l/dan po članu domaćinstva i time ugrožava snabdijevanje drugih potrošača;
- j) potrošač priključi nove mjerne instrumente potrošnje i kanalizacione instalacije ili izvrši rekonstrukciju postojećih, ili ako dozvoli da se na njihov priključak priključi drugi objekat, a za ove radove i postupke nema pismeno odobrenje Komunalnog preduzeća;
- k) potrošač namjerno pokvari mjerni instrument potrošnje;
- l) potrošač bez odobrenja Komunalnog preduzeća izvrši izmještanje kućnog priključka ili mjernog instrumenta potrošnje ili skidanje mjernog instrumenta potrošnje;
- m) potrošač svoju kućnu instalaciju priključi na kućne instalacije drugog korisnika bez odobrenja Komunalnog preduzeća;
- n) potrošač instalacije posebnih (lokalnih) vodovoda spoji sa instalacijama preko kojih se snabdijeva vodom iz gradskog vodovoda;
- o) onemoguću službenom licu pristup za očitavanje mjernog instrumenta potrošnje i nakon pismene opomene;
- p) onemoguću ulazak radi pregleda zajedničkih i unutrašnjih instalacija ovlaštenom predstavniku Komunalnog preduzeća, odnosno nadležnom inspektor, u zgradama gdje je zajedničko mjerilo ili gdje mjerilo ne postoji;
- q) potrošač koji je bio isključen sa komunalne mreže sam se ponovo priključi na komunalnu mrežu.

(2) Komunalne usluge iz stava (1) ovog člana uskratiti će se korisniku pod uslovom da to tehničke mogućnosti dozvoljavaju i da se isključenjem ne ugrožavaju drugi korisnici komunalnih usluga.

- (3) Po prestanku razloga za uskraćenje komunalne usluge, Komunalno preduzeće je dužno da, na zahtjev korisnika komunalne usluge, najkasnije u roku od tri dana od dana podnošenja zahtjeva i plaćenih stvarnih troškova za ponovno uključanje, nastave pružanje komunalne usluge korisniku.
- (4) Korisnik ne može otkazati korištenje komunalne usluge ako to tehničke mogućnosti ne dozvoljavaju, odnosno ako bi se time ugrozio kvalitet korištenja i standard drugih korisnika, te ako bi se time negativno uticalo na okoliš.

DIO III. HIDRANTI I JAVNI IZLJEVI

Član 30.

- (1) Na mreži javnog vodovoda postavljaju se hidranti za uzimanje vode za gašenje požara.
- (2) Hidranti iz prethodnog stava moraju biti javni i vidljivo obilježeni.

Član 31.

- (1) Voda iz javnih hidranata može se uzimati i za druge potrebe, ali samo na utvrđeni način i uz odobrenje Komunalnog preduzeća.
- (2) Preduzeća i druga pravna lica mogu uz odobrenje Komunalnog preduzeća uzimati vodu za svoje potrebe samo s određenih hidranata ispred kojih su ugrađeni vodomjeri i ispunjeni uslovi sanitarne sigurnosti vode.
- (3) Troškove izgradnje instalacija s vodomjerom i uređenja javne površine snose korisnici vode iz prethodnog stava.

Član 32.

- (1) Javne izljeve na području općine uspostavlja i održava Komunalno preduzeće isključivo na zahtjev nadležnog općinskog organa, a zavisno od tehničkih mogućnosti snabdijevanja vodom i odvođenja upotrijebljenih voda.
- (2) Troškove uspostavljanja i održavanja javnog izljeva kao i utroška vode i korištenja kanalizacije snosi podnosilac zahtjeva.
- (3) Pod javnim izljevima podrazumijevaju se javne česme, vodoskoci, fontane i sl.

Posebni vodovodi

Član 33.

- (1) Posebni vodovodi su samostalni objekti, postrojenja i oprema s vlastitim zahvatom vode, koji služe za snabdijevanje vodom pojedinih preduzeća i drugih organizacija i zajednica, fizičkih i pravnih lica, koja se iz tehničkih ili drugih razloga ne mogu priključiti na javni vodovod.
- (2) Posebne vodovode izgrađuju i održavaju njihovi korisnici i vlasnici.
- (3) Korisnici i vlasnici posebnih vodovoda su odgovorni za održavanje i funkcionisanje vodovoda koji su izgradili vlastitim sredstvima kao i za vršenje minimalnog broja propisanih pregleda zdravstvene ispravnosti vode za piće iz tih vodovoda.

Član 34.

Posebni vodovodi mogu se izgrađivati samo na osnovu prethodno utvrđenih vodoprivrednih uslova.

Član 35.

- (1) Korisnici vode iz posebnog vodovoda mogu se priključiti na javni vodovod kada se on izgradi.
- (2) Prilikom priključenja na javni vodovod, korisnik posebnog vodovoda je dužan postojeće objekte, postrojenja, opremu i mrežu posebnog vodovoda prilagoditi uslovima predviđenim ovom odlukom.
- (3) Odobrenje iz prethodnog stava daje Komunalno preduzeće.

DIO IV. KANALIZACIJA**Član 36.**

Vlasnici odnosno korisnici zemljišta i objekata dužni su da otpadne vode sa svojih zemljišta i iz objekata odvede u skladu sa Zakonom, drugim propisima i ovom odlukom.

Član 37.

- (1) Otpadne vode odvede se do prirodnih vodotoka putem posebnih sistema, objekata i postrojenja koji se dijele na:
- a) unutrašnju kanalizaciju,
 - b) vanjsku kanalizaciju.
- (2) Vanjska kanalizacija je javni odvodni sistem (javna kanalizacija).

Član 38.

- (1) Odvodni sistemi navedeni u prethodnom članu izgrađuju se i koriste u skladu sa Zakonom, drugim propisima i ovom odlukom.
- (2) Objekti i postrojenja za odvođenje otpadnih voda moraju biti tako izgrađeni i održavani da osiguravaju odvođenje predviđenih količina vode.

Član 39.

- (1) Sredstva za izgradnju javne kanalizacije utvrđuju se i ostvaruju prema posebnim zakonskim propisima.
- (2) Javna kanalizacija gradi se po glavnim projektima na osnovu prostornih i drugih planova i programa.
- (3) Javna kanalizaciona mreža se polaže na javnim površinama.

Unutrašnja kanalizacija**Član 40.**

Unutrašnja kanalizacija mora biti izvedena i održavana tako da se:

- a) isključi mogućnost zagađivanja okoline,
- b) onemogući razlijevanje otpadnih voda u podzemne slojeve,
- c) spriječi prenošenje zaraznih bolesti.

Član 41.

Unutrašnja kanalizacija za odvođenje industrijskih otpadnih voda mora biti izvedena od materijala koji je vodonepropusan i otporan na agresivne utjecaje upotrijebljene vode i temperaturu.

Član 42.

- (1) Tehnološke i radioaktivne otpadne vode mogu se ispuštati u javnu kanalizaciju samo ako su prethodno prečišćene do propisanog stepena.
- (2) Postrojenja unutrašnje kanalizacije za prečišćavanje vode moraju biti izvedena tako da je osigurano neprekidno prečišćavanje vode i kada se postrojenja za odvođenje čiste ili popravljaju.
- (3) Unutrašnja kanalizacija za odvođenje tehnoloških i radioaktivnih otpadnih voda mora biti izvedena tako da je omogućeno uzimanje uzoraka otpadne vode radi analize njenog sastava iz pojedinih pogona i tehnoloških cjelina u kojim otpadne vode nastaju.

Član 43.

Prečišćavaju se odnosno neutralizuju otpadne vode:

- 592 -

- a) s površina za pranje vozila iz mehaničarskih i metaloprerađivačkih radionica, radionica za popravku motornih i drugih vozila i javnih garaža - preko taložnika za krute materijale i odjeljivača masti, ulja i tekućih goriva,
- b) iz industrijskih pogona, zanatskih radionica, klaonica, poljoprivrednih dobara i šumskih gospodarstava i pogona koji u svom tehnološkom procesu imaju otpatke krutih i ljepljivih materija koje bi svojim taloženjem mogle začepiti kanalizaciju - preko odgovarajućih odjeljivača,
- c) iz kuhinja kapaciteta preko 250 obroka dnevno, skladišta i pogona koja u svom tehnološkom procesu uskladištavaju ili koriste ulja, masti, boje, lakove, tekuća goriva, razređivače i slične materije specifične težine lakše od vode - preko odgovarajućih odjeljivača,
- d) vode koje nisu nastale kao posljedica tehnološkog procesa, odnosno čiste tehnološke vode toplije od 40⁰ C - preko odgovarajućih rashladnih uređaja.

Član 44.

Prečišćavaju se i neutralizuju prije puštanja u javnu kanalizaciju, putem posebnih postrojenja za prečišćavanje, otpadne vode koje su agresivne ili toksične ili su zagađene patogenim klicama ili virusima, odnosno vode koje su radioaktivne.

Član 45.

Otpadne vode moraju biti prečišćene tako da se spriječi štetno djelovanje na kanalizacionu mrežu, da se zaštite radnici koji obavljaju poslove održavanja kanalizacione mreže i da se osigura normalno odvijanje procesa u postrojenjima za prečišćavanje otpadnih voda.

Član 46.

- (1) Upotrijebljene otpadne vode mogu se upustiti samo u fekalni kanal javnog kanalizacionog sistema i to priključkom preko kontrolnog okna.
- (2) Oborinske, drenažne, površinske vode i vode koje nisu nastale kao posljedica tehnoloških procesa i nisu toplije od 40⁰ C, upuštaju se u kanale javne kanalizacije i to priključkom preko kontrolnog okna.
- (3) U kanale javnog kanalizacionog sistema mogu se pustiti i:
 - a) oborinske vode s neizgrađenog građevinskog zemljišta i zelenih površina - samo preko taložnika i slivnika,
 - b) vode s prometnih i pješačkih površina, ograđenih prostora izvan javnih površina - samo preko slivnika,
 - c) prelivne vode fekalne kanalizacije - samo preko prelivne građevine,
 - d) prelivne vode rezervoara.

Član 47.

- (1) Kontrolno okno je dio unutrašnje kanalizacije prije njenog spoja s javnom kanalizacijom.
- (2) Kontrolno okno se, u pravilu, postavlja na mjesto do kojeg je osiguran nesmetan pristup.
- (3) U ulicama u kojim su zgrade izvedene u nizu uz javnu prometnu površinu, kontrolno okno se smješta izvan zgrade.
- (4) U ulicama u kojim su zgrade izvedene u nizu i udaljene od javne prometne površine, vanjski spojevi više izlaza iz zgrade pripadaju unutrašnjoj kanalizaciji, a najnižvodnije okno koje se priključuje na javnu kanalizaciju je kontrolno okno.
- (5) Kontrolno okno se gradi prema tipskom projektu, a izvodi ga Komunalno preduzeće.

Član 48.

- (1) Objekti i postrojenja koji služe samo za skupljanje otpadnih voda (u daljem tekstu: septičke jame)

- 593 -

moгу postojati na području općine Zavidovići u kojem nije izgrađena javna kanalizacija.

- (2) Septičke jame su objekti zatvorenog tipa od vodonepropusnog betona i grade se na mjestu do kojeg je osiguran nesmetan pristup radi čišćenja.
- (3) Tehničke uvjete gradnje, način korištenja i održavanja, nadzor nad izgradnjom, korištenjem i održavanjem septičkih jama iz stava 1. ovog člana te druga pitanja od značaja za njihovo djelovanje, propisuje nadležni općinski organ.

Član 49.

- (1) Vlasnici odnosno korisnici unutrašnje kanalizacije mogu biti fizička i pravna lica, koja su vlasnici odnosno korisnici objekata koji koriste unutrašnju kanalizaciju.
- (2) Vlasnici odnosno korisnici unutrašnje kanalizacije dužni su svoje objekte i postrojenja održavati u ispravnom stanju u skladu sa propisima o održavanju stambenih i drugih objekata.

Član 50.

Vlasnici odnosno korisnici unutrašnje kanalizacije dužni su u svako vrijeme omogućiti nesmetan pristup postrojenjima za pročišćavanje u kontrolnom oknu sanitarnoj i komunalnoj inspekciji kao i ovlaštenim licima Komunalnog preduzeća.

Član 51.

- (1) Vlasnici odnosno korisnici dužni su u tehnološkom procesu u kojem nastaju tehnološke i radioaktivne otpadne vode redovno analizirati sastav i osobine ovih voda.
- (2) Analizu sastava i osobina voda iz prethodnog stava, korisnici unutrašnje kanalizacije mogu povjeriti ovlaštenim organima u skladu sa Zakonom.
- (3) O rezultatima analize sastava i osobina otpadnih voda korisnici unutrašnje kanalizacije dužni su voditi evidencije i o njima obavještavati općinski organ uprave nadležan za poslove sanitarne inspekcije kao i Komunalno preduzeće.

Član 52.

- (1) Unutrašnja kanalizacija mora biti priključena na javnu kanalizaciju, ako ovom odlukom nije drugačije određeno.
- (2) Troškove izgradnje i održavanja unutrašnje kanalizacije snose njezini korisnici ako posebnim propisima nije drugačije određeno.

Član 53.

- (1) Kada se u pojedinim naseljima u kojim nije postojala javna kanalizacija ista izgradi, korisnici unutrašnje kanalizacije dužni su se priključiti o svom trošku na javnu kanalizaciju u roku od 6 mjeseci od dana donošenja odobrenja za korištenje javne kanalizacije.
- (2) Korisnici unutrašnje kanalizacije dužni su prije priključenja svoje instalacije, objekte i postrojenja unutrašnje kanalizacije prilagoditi odredbama ove Odluke.

Javna kanalizacija

Član 54.

- (1) Javnu kanalizaciju čine objekti i postrojenja za odvođenje otpadnih voda od spoja unutrašnje kanalizacije na javnu kanalizaciju do recipijenta.
- (2) Javna kanalizacija na području općine je kombinovana.

Član 55.

- (1) Atmosferske vode, prikupljene na javnim površinama mogu se direktno pustiti u kanal javne

kanalizacije samo preko slivnika s taložnikom.

- (2) Otpadne vode koje se puštaju u fekalni kanal javne kanalizacije upuštaju se u recipijent nakon što su pročišćene do stepena određenog općim tehničkim uslovima.

Član 56.

- (1) Javna kanalizacija mora biti izvedena i održavana u skladu s propisanim standardima i normativima tako da se osigurava kvalitetno odvođenje predviđenih količina vode, da se isključi mogućnost zagađenja razlijevanjem otpadnih voda u podzemne slojeve i na drugi način te da se spriječi prenošenje zaraznih bolesti.
- (2) Kontrolu nad održavanjem javne kanalizacije vrši općinski organ uprave nadležan za poslove komunalne inspekcije.

Priključenje korisnika na kanalizacionu mrežu

Član 57.

- (1) Unutrašnja kanalizacija i sistem odvođenja s javnih površina priključuje se na javnu kanalizaciju kanalizacijskim priključkom.
- (2) Kanalizacijski priključak je kanal koji spaja kontrolno okno s kanalom javne kanalizacije, odnosno spoj unutrašnje kanalizacije s javnom kanalizacijom.

Član 58.

Komunalno preduzeće dužno je podnosiocu zahtjeva, uz utvrđenu naknadu, dati:

- a) uslove i tehničke podatke potrebne za izradu projektne dokumentacije unutrašnjih kanalizacijskih instalacija,
- b) saglasnost za priključenje objekta na javnu kanalizaciju, ukoliko je projektna dokumentacija urađena na osnovu datih uslova i tehničkih podataka i ako postoje tehničke mogućnosti za priključenje.

Član 59.

- (1) Vlasnici odnosno korisnici unutrašnje kanalizacije, odnosno investitori objekata, dužni su zatražiti izgradnju kanalizacionog priključka i priključiti se na javnu kanalizaciju.
- (2) Ako su ispunjeni svi uslovi dati u saglasnosti za priključenje objekata propisanih prethodnim članom ove odluke, Komunalno preduzeće dužno je izvršiti priključak na javnu kanalizaciju.
- (3) Priključenje unutrašnjih instalacija kanalizacije na javnu kanalizaciju i poseban spoj na unutrašnju kanalizaciju susjednog objekta, kao i sve intervencije na priključku vrši isključivo Komunalno preduzeće.
- (4) Vlasnik odnosno korisnik unutrašnje kanalizacije ne smije dozvoliti spajanje unutrašnje kanalizacije susjednog objekta na instalaciju svog objekta, odnosno objekta koji koristi putem posrednog spoja, bez odobrenja Komunalnog preduzeća.
- (5) Priključenje javnih površina na javnu kanalizaciju vrši isključivo Komunalno preduzeće.

Član 60.

- (1) Priključenjem na javnu kanalizaciju, korisnik odnosno investitor iz prethodnog člana postaje korisnik javne kanalizacije.
- (2) Svaka unutrašnja kanalizacija, u pravilu, priključuje se na javnu kanalizaciju jednim fekalnim i jednim kišnim priključkom.

Član 61.

- (1) Na javnu kanalizaciju priključuje se i zemljište na kojem nisu izgrađeni objekti.
- (2) Zemljište na kojem nisu izgrađeni objekti mora se priključiti na javnu kanalizaciju, ako se nalazi

uz kanale javne kanalizacije i ako se oborinske i površinske vode s tog zemljišta slivaju na javne površine.

Član 62.

Izuzetno od odredaba člana 59. stav 2. ove odluke, može se odobriti priključenje na jednu unutrašnju kanalizaciju i više priključaka:

- a) ako se investicijsko-tehničkom dokumentacijom dokaže da je izgradnja više priključaka opravdana iz razloga ekonomičnosti, zbog potreba tehnološkog procesa i iz sličnih razloga,
- b) ako se objekat ili površina s koje se otpadne vode odvede nalaze u dva ili više kanalizacionih sljevova,
- c) ako se na javnu kanalizaciju direktno priključuje unutrašnja kanalizacija objekata s više nezavisnih cjelina.

Član 63.

- (1) Unutrašnja kanalizacija i zemljište na kojem nisu izgrađeni objekti, priključuje se na najekonomičniji način na kanale javne kanalizacije uz koje se nalazi.
- (2) Unutrašnja kanalizacija izgrađenih objekata i zemljišta na kojim nisu izgrađeni objekti, a koji se nalaze uz kanale javne kanalizacije, odnosno čiji priključci moraju proći preko zemljišta drugih vlasnika ili korisnika, priključuju se na javnu kanalizaciju uz saglasnost vlasnika odnosno korisnika tog zemljišta.
- (3) Troškovi svih radova nastalih izgradnjom kanalizacionog priključka, računajući i dovođenje zemljišta i objekata na površini drugog vlasnika ili korisnika u prvobitno stanje, kao i eventualna naknada prouzrokovane štete padaju na teret vlasnika ili korisnika objekta čija se unutrašnja kanalizacija priključuje na javnu kanalizaciju.
- (4) Ukoliko se priključak mora izvesti posredno putem tuđe unutrašnje kanalizacije, zajednički dio kanala postaje javni (priključni), a spojno okno dviju unutrašnjih kanalizacija postaje kontrolno. Posredan spoj se može izvesti samo u slučaju kada propusna moć unutrašnje kanalizacije na koju se vrši priključenje može bez rizika prihvatiti dodatne količine vode.

Član 64.

- (1) Sve opravke i izmjene kanalizacionog spoja od vanjskog priključka (šaht ispred objekta) na uličnu kanalizacionu cijev do kontrolnog okna vrši o svom trošku Komunalno preduzeće.
- (2) Svi priključeni vodovi i odvodi prenose se bez naknade u osnovna sredstva Komunalnog preduzeća, bez obzira na to o čijem su trošku izvedeni, s tim da ih je Komunalno preduzeće dužno održavati o svom trošku.
- (3) Pročišćavanje kanalizacijskog priključka vrši Komunalno preduzeće o trošku vlasnika odnosno korisnika unutrašnje kanalizacije koji je prouzrokovao začepljenje.
- (4) Nužne i hitne opravke i izmjene kanalizacijskih instalacija od šahta ispred objekta do tog objekta kao i u samom objektu vrši o svom trošku organizacija kojoj su povjereni na održavanje zajednički dijelovi i uređaji zgrade.

DIO V. NAKNADA ZA POTROŠENU VODU I KORIŠTENJE JAVNE KANALIZACIJE**Član 65.**

- (1) Potrošnja vode mjeri se vodomjerom.
- (2) Potrošnja vode čitavog objekta mjeri se jednim vodomjerom na priključku objekta (centralni vodomjer), u skladu sa Zakonom o komunalnim djelatnostima i ovom odlukom.
- (3) U stambenim objektima s više odvojenih stubišta, za svako stubište ugradit će se poseban vodomjer (centralni vodomjer) u skladu sa Zakonom o komunalnim djelatnostima i ovom Odlukom.

- (4) Komunalno preduzeće dužno je omogućiti svim korisnicima koji žive u stambenim jedinicama kolektivnog stanovanja (zgradama), ugradnju pojedinačnih –internih vodomjera.
- (5) Za jedan objekat, odnosno stubište, mogu se ugraditi dva ili više vodomjera, ako ima potrošača koji plaćaju različite cijene za korištenje vode.
- (6) Poslovni prostori moraju posjedovati zaseban vodomjer, a mjesto postavljanja odredit će se uz saglasnost Komunalnog preduzeća.

Član 66.

- (1) Jedinica mjere koja služi za obračun potrošene vode i naknade za korištenje kanalizacije je m³ potrošene vode.
- (2) Potrošnja vode utvrđuje se prema razlici stanja brojila vodomjera na kraju i na početku obračunskog razdoblja, s tim da se čitaju samo cijeli kubni metri utrošene vode.

Član 67.

- (1) Potrošač je dužan uvijek omogućiti nesmetan pristup vodomjeru.
- (2) Prvu nabavku i ugradnju vodomjera korisnik plaća prilikom priključenja objekta na vodovod.
- (3) Ako potrošač sam nabavlja vodomjer, dužan je nabaviti onakav vodomjer kakav odredi Komunalno preduzeće i koji je odobren od strane Instituta za Mjeriteljstvo BiH.
- (4) Održavanje, baždarenje, popravku i zamjenu vodomjera, na propisan način, vrši Komunalno preduzeće.
- (5) Zamjena starih, ispravnih ili neispravnih vodomjera u zgradama kolektivnog stanovanja podrazumjeva se kao druga nabavka i ugradnja.
- (6) Oštećenja na vodomjerima nastala krivnjom potrošača, popravljaju Komunalno preduzeće o trošku potrošača.
- (7) U spornim slučajevima iz prethodnog stava o plaćanju troškova odlučuje nadležni sud. Sudski postupak ne odlaže izvršenje opravke.

Član 68.

Potrošač koji stanuje u stambenom objektu za koji je postavljen centralni vodomjer, a koji u svom stanu nema poseban vodomjer, plaća naknadu za utrošenu vodu prema računu Komunalnog preduzeća iskazanom po obračunu utroška vode po pripadajućem centralnom vodomjeru podjeljen prema broju članova domaćinstva.

Član 69.

Korisnik koji u svom stanu ima poseban vodomjer, plaća naknadu za utrošenu vodu prema računu Komunalnog preduzeća iskazanom po obračunu utroška vode s tog vodomjera.

Član 70.

- (1) Postavljanje vodomjera vrši Komunalno preduzeće.
- (2) Potrošaču koji pismeno zatraži ugradnju vodomjera, ugradnju će na njegov trošak izvršiti Komunalno preduzeće.
- (3) Po ugrađivanju vodomjera, isti se daju na upravljanje Komunalnom preduzeću, bez obzira na to o čijem su trošku ugrađeni, s tim da ih je Komunalno preduzeće dužno održavati (pregledati, popravljati, baždariti, zamijeniti novim).
- (4) Ugradnju centralnih vodomjera kao i njihovu opravku u stambenim objektima vrši Komunalno preduzeće uz prethodno obavještenje organizacije kojoj su povjereni na održavanje zajednički dijelovi i uređaji zgrada, ako takva organizacija postoji, a u skladu sa Zakonom o komunalnim djelatnostima. Nakon ugradnje vodomjera potrošač potpisuje zapisnik o ugradnji.
- (5) Potrošač vode ne smije skidati vodomjer ili plombu s vodomjera bez prisustva ovlaštenog lica Komunalnog preduzeća.

- 597 -

Član 71.

- (1) Visinu cijene i način plaćanja komunalne usluge predlaže Komunalno preduzeće, na temelju detaljne kalkulacije, a u skladu sa odredbama čl. 10., 11., i 12. Zakona o komunalnim djelatnostima, kojom se obezbjeđuje najmanje prosta reprodukcija u periodu od dvije godine.
- (2) Cijena komunalne usluge sadrži sve troškove tekućeg održavanja i funkcionisanja komunalnog sistema, te troškove nabavke novih stalnih sredstava Komunalnog preduzeća i anuitete kreditnih zaduženja za strateške projekte prema članu 34. stav 2. i 3. Zakonom o komunalnim djelatnostima.
- (3) Odnos cijena komunalnih proizvoda i usluga individualne komunalne potrošnje za potrošače domaćinstva u stambenim objektima i stanovima i potrošače pravna lica subjekte u poslovnim objektima i prostorima određuje svojim propisom Općinsko vijeće.
- (4) U cijenu komunalne usluge uključena je amortizacija koja se sastoji iz amortizacije stalnih sredstava koja Komunalnom preduzeću služe kao sredstvo za rad i amortizacije stalnih sredstava infrastrukturnog komunalnog sistema, koja po svom karakteru moraju biti ili već jesu javna dobra u općoj upotrebi.
- (5) Komunalno preduzeće sredstva izdvojena po osnovu amortizacije koristi za obnavljanje stalnih sredstava rada po programu preduzeća, a dio amortizacije stalnih sredstava infrastrukturnog komunalnog sistema, odnosno dobara u općoj upotrebi koristi prema programu na koji saglasnost daje vlasnik tih sredstava u općoj upotrebi.
- (6) Validnost kalkulacije i utvrđivanje cijena komunalnih usluga vrši se u skladu sa Zakonom o komunalnim djelatnostima.
- (7) Cijena komunalne usluge za pruženu komunalnu uslugu plaća se Komunalnom preduzeću.
- (8) Ukoliko Općinsko vijeće utvrdi nižu cijenu usluge od ekonomske cijene ili je ne usaglašava sa rastom cijena, onda je isti organ davocu komunalne usluge obavezan naknaditi razliku sredstava.

Član 72.

- (1) Korisnik komunalne usluge dužan je platiti utvrđenu cijenu za pruženu komunalnu uslugu, u ugovorenom – propisanom roku, kao i izvršiti prijavu i odjavu svih promjena (promjena adrese, broj članova domaćinstva, površina objekta i slično), u roku od 8 dana od nastale promjene.
- (2) O sporovima između korisnika i davaoca komunalne usluge odlučuje nadležni sud.

Član 73.

- (1) Komunalno preduzeće će mjesečno vršiti ažuriranje evidencija bitnih za obračun utroška vode i naknade za kanalizaciju.
- (2) Račun, za obračun utrošak vode i naknade za kanalizaciju Komunalno preduzeće će ispostavljati na bazi očitavanja vodomjera mjesečno ili dvomjesečno, a za vikend naselja i za više mjeseci.
- (3) Kad očitavanje vodomjera nije moguće zbog niskih temperatura ili otežanih zimskih uslova, obračun utroška vode i naknade za kanalizaciju izvršiće se akontativno na bazi zadnjeg očitavanja vodomjera.
- (4) U slučaju iz prethodnog stava konačan obračun utroška vode i naknade za kanalizaciju izvršit će se kod narednog redovnog očitavanja stanja vodomjera.
- (5) Očitavanje vodomjera (posebnih i centralnih) vrše ovlaštena lica Komunalnog preduzeća, koja su na zahtjev korisnika dužna pokazati pismeno ovlaštenje ili identifikaciju.
- (6) Stanje brojlara na vodomjeru očitava se po rasporedu koji određuje Komunalno preduzeće.

Član 74.

Komunalno preduzeće dužno je uredno voditi sljedeće službene evidencije:

- a) evidenciju kućnih vodomjera,
- b) evidenciju centralnih vodomjera,

- 598 -

- c) evidenciju broja korisnika usluga za svaku stambenu jedinicu,
- d) evidenciju o ispostavljenim računima.

Član 75.

- (1) Evidencija o broju korisnika usluga za svaku stambenu jedinicu utvrđuje se putem skupa etažnih vlasnika, Odbora skupa etažnih vlasnika, Predsjednika zgrade ili savjeta Mjesnih zajednica, odnosno utvrđivanjem stanja od strane ovlaštenih osoba Komunalnog preduzeća.
- (2) Svaku promjenu u domaćinstvu potrošač je dužan u pismenoj formi prijaviti Komunalnom preduzeću.
- (3) U slučaju da potrošač odbije ili propusti prijaviti promjenu iz prethodnog stava to će uz pismenu evidenciju učiniti ovlaštene osobe Komunalnog preduzeća.

Član 76.

Potrošač je dužan omogućiti očitavanje vodomjera. Ako krivnjom potrošača očitavač nije mogao izvršiti očitavanje vodomjera, potrošnja vode za taj mjesec određuje se procjenom na osnovu prosječne potrošnje vode u posljednja tri mjeseca, a definitivno prilikom sljedećeg očitavanja.

Član 77.

Korisnici kod kojih se potrošnja ne može mjeriti ni posebnim ni centralnim vodomjerom, plaćaju naknadu za utrošenu vodu i korištenje kanalizacijske mreže u skladu sa Odlukom o utvrđivanju cjenovnika komunalnih usluga i načinu plaćanja komunalnih usluga.

Član 78.

Kod potrošača koji nemaju ugrađen vodomjer, u slučajevima kada se utvrdi da postojeći vodomjer nije tehnički ispravan, kao i u slučaju iz predhodnog člana, potrošnja vode obračunava se u skladu sa Odlukom o utvrđivanju cjenovnika komunalnih usluga i načinu plaćanja komunalnih usluga.

Član 79.

Svi novi potrošači, prije priključenja na vodovodnu i kanizacionu mrežu, pored troškova iz člana 20. Odluke dužni su uplatiti priključnu taksu u iznosu utvrđenom u važećem cjenovniku.

Član 80.

- (1) Komunalno preduzeće ispostavlja potrošačima račune za potrošenu vodu i korištenje kanalizacije svakog mjeseca ili svaka dva mjeseca a za vikend naselja i za više mjeseci.
- (2) Računi se dostavljaju putem ovlaštenih lica Komunalnog preduzeća..
- (3) Potrošači su dužni dostavljene račune za potrošenu vodu i korištenje kanalizacije izmiriti u roku od osam dana od dana prijema računa.

Član 81.

- (1) Reklamacije na račune za potrošenu vodu i korištenje kanalizacije mogu se podnijeti Komunalnom preduzeću isključivo pismenim putem, a najkasnije trideset dana od dana izdavanja računa.
- (2) Komunalno preduzeće dužno je odgovoriti na reklamaciju najkasnije u roku od osam dana po njenom prijemu.
- (3) Ukoliko se reklamacija odbije, Komunalno preduzeće je dužno dati pismeno obrazloženje odbijanja reklamacije.

- 599 -

Član 82.

- (1) Potrošač je dužan plaćati račune za utrošenu vodu i kanalizaciju sve do privremene ili trajne odjave.
- (2) Odjava se podnosi Komunalnom preduzeću, a može biti privremena i trajna.
- (3) Privremena odjava ne može biti kraća od 2 mjeseca.
- (4) U slučaju privremene odjave potrošnje vode, plombira se glavni dovodni ventil za nekretninu (stan, kuća i poslovni prostor).
- (5) U slučaju trajne odjave potrošnje vode, vrši se isključenje vode na priključku.
- (6) Troškove plombiranja ventila i otvaranje ventila snosi naručilac.
- (7) Svaka promjena vlasnika objekta, odnosno potrošača, obavezno se prijavljuje Komunalnom preduzeću u pismenoj formi.
- (8) Ukoliko potrošač odbije ili propusti podnijeti pismenu odjavu, prijaviti promjenu vlasnika objekta, odnosno potrošača, kao i druge promjene bitne za obračun utroška vode i naknade za kanalizaciju, to mogu uz pismenu evidenciju učiniti ovlaštena lica Komunalnog preduzeća.

Član 83.

- (1) Potrošač ima pravo, u slučaju sumnje u ispravnost očitavanja vodomjera ili sumnje u ispravnost vodomjera, pismeno tražiti od Komunalnog preduzeća da se provjeri tačnost očitavanja i ispravnost vodomjera.
- (2) Na zahtjev iz prethodnog stava, Komunalno preduzeće je dužno u roku od 5 dana izvaditi vodomjer i dostaviti ga na kontrolu za ispitivanje.
- (3) Smatra se da je vodomjer ispravan ako mu odstupanja u radu nisu veća od dozvoljenih po propisima Zakona o mjeriteljstvu.
- (4) U slučaju neispravnosti vodomjera, troškove kontrole snosi Komunalno preduzeće, a u slučaju ispravnosti vodomjera troškove kontrole snosi potrošač.
- (5) Ako je utvrđeno da su odstupanja u radu vodomjera veća od dozvoljenih, ispravlja se zaračunata potrošnja vode prema iznosu utvrđenog odstupanja.
- (6) Za vrijeme dok se vodomjer nalazi na kontroli ispitivanja ispravnosti, potrošnja vode će se obračunavati na osnovu prosječne potrošnje vode u prethodna tri obračunska perioda.

Član 84.

- (1) U slučajevima nemogućnosti očitavanja vodomjera zbog više sile ili u zimskom periodu kada su instalacije zaštićene od smrzavanja, obračun potrošnje vode će se izvršiti na bazi zadnjeg računa, a konačan obračun utrošene vode izvršit će se prilikom sljedećeg očitavanja vodomjera.
- (2) Potrošač se mora brinuti da se kućne vodovodne i kanalizacione instalacije i sva izljevna mjesta zaštite od oštećenja i kvarova i da uvijek budu ispravne za trajno služenje njihovoj namjeni kao i da vodovodne i kanalizacione instalacije zaštite od smrzavanja.

Oslobađanje plaćanja naknade za potrošenu vodu

Član 85.

- (1) Za vodu koja je potrošena za gašenje požara, a uzeta je iz javne vodovodne mreže ili iz kućnih hidranata, ne plaća se naknada.
- (2) Ukoliko je požar gašen putem kućnih hidranata, a potrošnja registrovana centralnim vodomjerom, naknada za potrošenu vodu obračunava se na osnovu prosječne dnevne potrošnje u prethodnom mjesecu pod uslovom da je požar registrovan u Policijskoj upravi Zavidovići.

- 600 -

Član 86.

- (1) Komunalno preduzeće će, u slučaju većih gubitaka vode, do kojih je došlo bez krivice potrošača, usljed kvara na vezi kod vodomjera, na samom vodomjeru, kvara na ventilu, i sl. pod uslovom da je takav kvar registrovan u službenim evidencijama istog, na pismeni zahtjev potrošača, koji mora biti podnesen u roku od 3 dana od dana kada je kvar nastao, ili ako nije moguće utvrditi dan nastanka kvara, najkasnije u roku od 15 dana od dana izdavanja računa, osloboditi potrošača plaćanja naknade za tako izgubljenu vodu.
- (2) Osnova za utvrđivanje izgubljene vode je veća potrošnja vode od prosječno utvrđene potrošnje vode u prethodna tri obračunska perioda kada nije bilo kvara.

DIO VI. ŠTEDNJA VODE

Član 87.

- (1) Pravno lice kojem su povjereni zajednički dijelovi i uređaji zgrada na održavanje dužno je redovno održavati u ispravnom stanju sve vodovodne instalacije od glavnog vodomjera do potrošača (vertikalne i horizontalne) kao i kanalizacione instalacije u stambenim objektima koji su mu povjereni na održavanje.
- (2) U slučaju kvarova na tim instalacijama, pravno lice iz prethodnog stava dužno je odmah, a najkasnije u roku od 3 dana od prijavljenog kvara, izvršiti hitne i nužne popravke.

Član 88.

- (1) Potrošač je dužan osigurati da se unutrašnje vodovodne i kanalizacione instalacije i sva izljevna mjesta zaštite od oštećenja i kvarova kako ne bi dolazilo do nepotrebnog rasipanja vode.
- (2) Potrošač je dužan blagovremeno poduzeti sve potrebne mjere da se vodomjer kao i dio vodovodnog priključka te kanalizacione instalacije zaštite od smrzavanja i eventualnog pucanja.

Član 89.

- (1) U slučaju povećane potrošnje vode i njenog rasipanja po pojedinim objektima gdje svi potrošači nemaju ugrađen poseban vodomjer, na zahtjev predsjednika ili ovlaštenog predstavnika skupa etažnih vlasnika, vrši se kontrola ispravnosti svih izljevniha mjesta u domaćinstvima.
- (2) Kontrolu zajednički vrše:
 - a) ovlašteno lice iz pravnog lica kojem su povjereni na održavanje zajednički dijelovi i uređaji zgrada,
 - b) ovlašteno lice iz Komunalnog preduzeća,
 - c) komunalni inspektor,
 - d) predsjednik ili ovlašteni predstavnik skupa etažnih vlasnika.

Član 90.

- (1) Potrošaču kod kojeg se pronađu neispravni uređaji i instalacije iz prethodnog člana, daje se nalog da u roku od 5 dana kvar otkloni i o tome se sačinjava zapisnik.
- (2) Ako potrošač i nakon toga ne otkloni kvar, komunalni inspektor će protiv istog pokrenuti odgovarajući postupak.

Član 91.

Komunalno preduzeće dužno je putem oglasa, svoje web stranice, lokalnog medija ili na drugi pogodan način obavijestiti korisnike komunalnih usluga o planiranim ili očekivanim smetnjama i prekidima koji će nastati ili mogu nastati u pružanju komunalnih usluga najkasnije jedan dan prije očekivanog prekida u pružanju tih usluga.

- 601 -

Član 92.

- (1) U slučaju nastupanja neplaniranih i neočekivanih poremećaja ili prekida u pružanju komunalnih usluga, odnosno obavljanju komunalnih djelatnosti, Komunalno preduzeće dužno je odmah o tome na adekvatan način obavijestiti nadležni organ za komunalne poslove Općine Zavidovići i istovremeno poduzeti mjere za otklanjanje uzroka poremećaja ili prekida.
- (2) Nadležni organ za komunalne poslove Općine Zavidovići po prijemu obavještenja iz stava (1) ovog člana, odnosno po utvrđivanju poremećaja ili prekida u pružanju komunalnih usluga, dužan je odmah da:
 - a) odredi red prvenstva i način pružanja usluga onim korisnicima kod kojih bi usljed prekida nastala opasnost po život i rad građana ili rad pravnih i fizičkih lica ili bi nastala značajna odnosno nenadoknadiva šteta;
 - b) naredi mjere za hitnu zaštitu komunalnih objekata i druge imovine koja je ugrožena;
 - c) poduzme mjere za otklanjanje nastalih posljedica i druge potrebne mjere za obavljanje komunalnih djelatnosti;
 - d) utvrdi razloge i eventualnu odgovornost za poremećaj, odnosno prekid vršenja djelatnosti i učinjenu štetu.
- (3) Ukoliko je prekid u pružanju komunalnih usluga nastao kao posljedica neodgovornog i nesavjesnog rada Komunalnog preduzeća, isto je dužno namiriti eventualno izazvanu štetu kod korisnika komunalnih usluga.

Član 93.

Sredstva za obavljanje komunalne djelatnosti, iz oblasti vodovoda i kanalizacije, osiguravaju se iz:

- a) prihoda ostvarenih od komunalnih usluga iz segmenta individualne komunalne potrošnje iz oblasti vodovoda i kanalizacije;
- b) budžeta Općine Zavidovići,
- c) drugih izvora po posebnim propisima.

Član 94.

- (1) Iz prihoda ostvarenih od komunalnih usluga iz segmenta individualne komunalne potrošnje, iz oblasti vodovoda i kanalizacije, osiguravaju se sredstva za obavljanje sljedećih komunalnih djelatnosti:
 - a) snabdijevanje pitkom vodom
 - b) odvođenje i prečišćavanje otpadnih voda.

DIO VII. OSTALE ODREDBE

Član 95.

Iznad vodovodnih i kanizacionih cjevovoda i pripadajućih podzemnih građevina i mreže sistema daljinskog upravljanja ne može se dati saglasnost za izgradnju.

DIO VIII. NADZOR

Član 96.

- (1) Općinski organ uprave nadležan za poslove sanitarne inspekcije dužan je organizovati i provoditi stalni nadzor kvaliteta vode iz javnog vodovoda, izvorišta i bunara.
- (2) Komunalno preduzeće dužno je vodu redovno dezinfikovati i osigurati stalni i sistematski pregled vode radi provjeravanja da li ona odgovara propisanim uslovima.
- (3) Nadzoru podliježu i objekti, postrojenja i oprema koji se koriste za sabdijevanje vodom za piće.

- 602 -

Član 97.

Komunalno preduzeće, vršeći javna ovlaštenja, u slučaju da ustanove da je učinjen prekršaj iz Zakona o komunalnim djelatnostima iz njihove nadležnosti, može izdati prekršajni nalog ili podnijeti zahtjev za pokretanje prekršajnog postupka nadležnom sudu u skladu sa odredbama propisa o prekršajima.

Član 98.

Komunalno preduzeće dužno je da redovno vrši pregled, baždarenje i zamjenu vodomjera u skladu sa važećim propisima o mjeriteljstvu.

Član 99.

Nadzor nad provođenjem odredaba ove odluke vrše općinski organi koji su nadležni za oblast vodovoda i kanalizacije.

DIO IX. KAZNENE ODREDBE

Član 100.

(1) Novčanom kaznom od 1.000,00 KM do 5.000,00 KM kaznit će se za prekršaj Komunalno preduzeće ako:

- a) neprekidno ne održava u ispravnom stanju vodovodne i kanalizacione uređaje (član 3.),
- b) ne preduzima tehničke mjere kojim se osigurava higijenska ispravnost vode (član 9.),
- c) ne provodi sve zaštitne mjere propisane za izvorišno područje i za sprečavanje štetnih uticaja na kvalitet vode za piće (član 14.),
- d) u redovnim prilikama ne osigurava stalno snabdijevanje vodom svih svojih potrošača (član 17.),
- e) podnosiocu zahtjeva uz utvrđenu naknadu ne izda uslove i tehničke podatke potrebne za izradu projektne dokumentacije unutrašnjih instalacija vodovoda (član 18.),
- f) podnosiocu zahtjeva ne izda saglasnost za priključenje objekta na javni vodovod, ukoliko je projektna dokumentacija urađena na osnovu datih uslova i tehničkih podataka i ako postoje tehničke mogućnosti za priključenje (član 18.),
- g) ne izvrši priključak objekta na javni vodovod ako su ispunjeni svi uslovi dati u saglasnosti za njegovo priključenje i ako objekat ima odobrenje za građenje ili ako izvrši priključenje na javnu vodovodnu mrežu objekta koji je izgrađen bez odobrenja za građenje (član 21.),
- h) korisnika priključka ne obavijesti o namjeravanim radovima, osim u hitnim slučajevima kada se intervencija ne može odlagati (član 26.),
- i) prijavljeni kvar na javnoj vodovodnoj mreži ne počne otklanjati u utvrđenom roku i ako prijavljeni kvar ne otkloni bez prekida radova (član 26.),
- j) ne uskrati komunalnu uslugu korisniku u predviđenim slučajevima (član 29.),
- k) podnosiocu zahtjeva, uz plaćenu naknadu, ne izda uslove i tehničke podatke potrebne za izradu projektne dokumentacije unutrašnjih kanalizacionih instalacija (član 58.),
- l) podnosiocu zahtjeva ne izda saglasnost za priključenje objekta na javnu kanalizaciju, ukoliko je projektna dokumentacija urađena na osnovu datih uslova i tehničkih podataka i ako postoje tehničke mogućnosti za priključenje (član 58.),
- m) ne izvrši priključak objekta na javnu kanalizaciju ako su ispunjeni svi uslovi dati uz saglasnost za priključenje objekta propisani članom 58. ove odluke (član 59.),
- n) ne vodi uredno službene evidencije (član 74.),
- o) ne odgovori na reklamaciju najkasnije u roku od 8 dana po njenom prijemu (član 81.),
- p) ne da obrazloženje odbijanja reklamacije (član 81.),

- q) ako u sredstvima javnog informisanja ili na drugi pogodan način blagovremeno ne obavijesti korisnika komunalnih usluga o planiranim i očekivanim smetnjama i prekidima koje mogu nastati u pružanju komunalnih usluga (član 91.),
- r) ne vrši redovno dezinfikovanje i ne osigurava stalni i sitematski pregled vode radi provjeravanja da li voda odgovara propisanim uslovima (član 96.),
- s) ako u slučaju nastupanja neplaniranih ili neočekivanih poremećaja ili prekida u pružanju komunalnih usluga odnosno obavljanja komunalne djelatnosti na adekvatan način ne obavijesti nadležni organ za komunalne poslove Općine (član 92.),
- t) ako ne izvrši baždarenje vodomjera u roku utvrđenom ovom odlukom (član 98.).

(2) Za prekršaj iz prethodnog stava kaznit će se i odgovorno lice u Komunalnom preduzeću novčanom kaznom od 200,00 KM do 1.000,00 KM.

Član 101.

(1) Novčanom kaznom od 1.000,00 KM do 5.000,00 KM kaznit će se za prekršaj pravno lice kao korisnik komunalne usluge ako:

- a) izvrši neovlašteno priključenje na komunalnu infrastrukturu (član 29.),
- b) neovlašteno interveniše na komunalnoj infrastrukturi (član 29.),
- c) neovlašteno koristi komunalne usluge (član 29.),
- d) svojim radnjama onemogućiti nesmetano korištenje komunalne usluge u zgradi (član 29.),
- e) spriječi davaocu komunalne usluge da interveniše na komunalnoj infrastrukturi i postrojenjima i time ugrozi korištenje komunalne usluge ostalim korisnicima (član 29.),
- f) spriječi ulazak radi pregleda zajedničkih i unutrašnjih instalacija ovlaštenom predstavniku davaoca komunalnih usluga upravitelja, odnosno nadležnom inspektor (član 29.),
- g) oštećuje, odnosno uništava stalna sredstva postrojenja i drugu komunalnu opremu i na taj način nepovoljno utiče na normalno pružanje komunalnih usluga ostalim korisnicima, odnosno na sam kvalitet tih usluga (član 29.).
- h) svojim radnjama onemogućiti isključenje komunalne usluge.

(2) Novčanom kaznom od 200,00 KM do 1.000,00 KM kaznit će se za prekršaj iz stava 1. ovog člana i odgovorno lice pravnog lica.

Član 102.

(1) Novčanom kaznom od 1.000,00 KM do 5.000,00 KM kaznit će se za prekršaj upravitelj kojem su povjereni na održavanje zajednički dijelovi i uređaji zgrada:

- a) ako o svom trošku ne izvrši nužne i hitne opravke i izmjene na vodovodnim instalacijama od šahta do izljevniha mjesta u stambenim objektima (član 87.),
- b) ako o svom trošku ne izvrši nužne i hitne opravke i izmjene kanalizacijskih instalacija od šahta ispred objekta do tog objekta kao i u samim objektima (član 87.),
- c) ako ne održava u ispravnom stanju sve vodovodne instalacije od glavnog priključka do potrošača kao i kanalizacijske instalacije u stambenim objektima koji su joj povjereni na održavanje (član 87.),
- d) ako u utvrđenom roku na prijavljenom kvaru ne izvrši hitne i nužne popravke (član 87.),

(2) Za prekršaj iz prethodnog stava kaznit će se i odgovorna osoba u toj organizaciji novčanom kaznom od 200,00 KM do 1.000,00 KM.

- 604 -

Član 103.

(1) Novčanom kaznom od 300,00 KM do 1500,00 KM kaznit će se za prekršaj investitor, odnosno korisnik ako:

- a) ne štedi ili nekontrolisano rasipa i prekomjerno troši vodu iz javnog vodovoda u vrijeme nestašice vode i u drugim vanrednim prilikama (član 18.),
- b) ne zatraži saglasnost za priključenje objekta na javni vodovod (član 19.),
- c) kao korisnik unutrašnje vodovodne instalacije dozvoli spajanje unutrašnje vodovodne instalacije susjednog objekta na unutrašnju vodovodnu instalaciju svog objekta, odnosno objekta koji koristi putem posrednog spoja, bez odobrenja Komunalnog preduzeća (član 25.),
- d) o namjeravanoj intervenciji na spojnom vodu od granice javne površine do vodomjera ne obavijesti Komunalno preduzeće (član 26.),
- e) svoje odvodne instalacije ne priključi na javnu kanalizaciju (član 59.),
- f) gradi poseban vodovod na području grada bez prethodno utvrđenih vodoprivrednih uslova i koristi ga bez dobivanja vodoprivredne dozvole,
- g) prilikom priključenja posebnog vodovoda na javni vodovod, postojeće objekte, postrojenja, opremu i mrežu posebnog vodovoda ne prilagodi uslovima predviđenim ovom odlukom ,
- h) otpadne vode sa svojih zemljišta i iz objekata ne odvede u skladu sa Zakonom, drugim propisima i ovom odlukom,
- i) svoje objekte unutrašnje kanalizacije i postrojenja ne održava u ispravnom stanju u skladu sa propisima o održavanju stambenih i drugih objekata (član 49.),
- j) onemogućiti nesmetan pristup sanitarnoj ili komunajnoj inspekciji kao i ovlaštenim licima Komunalnog preduzeća postrojenjima za pročišćavanje u kontrolnom oknu (član 50.),
- k) u tehnološkom procesu u kome nastaju tehnološke i radioaktivne vode, ne vrši redovno analiziranje sastava i osobina ovih voda (član 51.),
- l) unutrašnju kanalizaciju ne priključi na javnu kanalizaciju (član 52.),
- m) svoju unutrašnju kanalizaciju ne priključi na javnu kanalizaciju u roku od 6 mjeseci od dana donošenja odobrenja za korištenje javne kanalizacije (član 53.),
- n) prije priključenja unutrašnje kanalizacije na javnu kanalizaciju, svoje objekte, instalacije i postrojenja unutrašnje kanalizacije ne prilagodi odredbama ove Odluke (član 56.),
- o) ne zatraži izgradnju kanalizacijskog priključka i ne priključi se na javnu kanalizaciju (član 59.),
- p) dozvoli spajanje unutrašnje kanalizacije susjednog objekta na instalaciju svog objekta, odnosno objekta koji koristi putem posrednog spoja bez prethodnog odobrenja Komunalnog preduzeća (član 59.),
- q) zemljište na kojem nisu izgrađeni objekti ne priključi na javnu kanalizaciju ako se nalazi uz kanale javne kanalizacije i ako se oborinske i površinske vode s tog zemljišta slijevaju na javne površine (član 61.),
- r) skine vodomjer ili plombu s vodomjera bez prisustva ovlaštenog lica Komunalnog preduzeća (član 70.),
- s) ne prijavi promjenu u domaćinstvu (član 72.),
- t) ovlaštenom licu Komunalnog preduzeća onemogućiti očitavanje vodomjera i isključenje komunalne usluge (član 76.),

- u) unutrašnje vodovodne i kanalizacione instalacije i sva izljevna mjesta ne zaštiti od oštećenja i kvarova (član 88.),
- v) blagovremeno ne preduzme sve potrebne mjere da se dio vodovodnog priključka, kao i kanalizacione instalacije zaštite od smrzavanja (član 88.),
- w) u utvrđenom roku kvar ne otkloni (član 90.),
- x) iznad vodovodnih i kanalizacijskih cjevovoda i pripadajućih podzemnih građevina i mreže sistema daljinskog upravljanja gradi ili postavlja bilo kakve stalne i povremene objekte i instalacije (član 95.),
- y) izvrši neovlašteno priključenje na komunalnu infrastrukturu (član 29.) ,
- z) neovlašteno interveniše na komunalnoj infrastrukturi (član 29.),
- aa) neovlašteno koristi komunalne usluge (član 29.),
- bb) svojim radnjama onemogućiti nesmetano korištenje komunalne usluge u zgradi (član 29.),
- cc) spriječi davaocu komunalne usluge da interveniše na komunalnoj infrastrukturi i postrojenjima i time ugrozi korištenje komunalne usluge ostalim korisnicima (član 29.),
- dd) spriječi ulazak radi pregleda zajedničkih i unutrašnjih instalacija ovlaštenom predstavniku davaoca komunalnih usluga upravitelja, odnosno nadležnom inspektoru (član 29.),
- ee) oštećuje, odnosno uništava stalna sredstva postrojenja i drugu komunalnu opremu i na taj način nepovoljno utiče na normalno pružanje komunalnih usluga ostalim korisnicima, odnosno na sam kvalitet tih usluga (član 29.).

DIO X. ZAVRŠNE ODREDBE**Član 104.**

- (1) Komunalno preduzeće je dužno o svom trošku izvršiti zamjenu starih i neispravnih vodomjera u zgradama kolektivnog stanovanja.
- (2) Potrošači u zgradama kolektivnog stanovanja mogu o svom trošku izvršiti zamjenu starog i neispravnog vodomjera, a Komunalno preduzeće dužno je u roku od 12 mjeseci od dana postavljanja vodomjera potrošaču refundirati troškove, ali samo ukoliko je vodomjer postavljen u skladu sa odredbama ove Odluke.
- (3) Potrošači u zgradama kolektivnog stanovanja, koji su do dana stupanja na snagu ove Odluke, a po uputama Komunalnog preduzeća, zamijenili stare i neispravne vodomjere, imaju pravo na refundiranje troškova zamjene vodomjera.

Član 105.

Stupanjem na snagu ove Odluke prestaje da važi Odluka o vodovodu i kanalizaciji („Službeni glasnik Općine Zavidovići“, broj: 7/2005).

Član 106.

Ova Odluka stupa na snagu osmog dana od dana objavljivanja Službenom glasniku Općine Zavidovići.

**PREDSJEDAVAJUĆI
OPĆINSKOG VIJEĆA**

(M.P.)

Hadžić dr Amira, spec.radiolog, s.r.